

ՈՒՍՏԻԱՆ.– Գնա վրայ՝ տուր թշնամուն... ո՞ր ես գալիս: Տես ամաններն եմ տանում տեղը դնեմ:

ՆԱԶԱՐ.– Մենակ ո՛ր ես գնում: Սպասիր հետո՞ գամ չվախես:

ՈՒՍՏԻԱՆ.– Տե՛ղդ վեր ընկի, տե՛ղդ: (Դուրս է ելնում):

ՆԱԶԱՐ.– (Հետեւից գնալով) Ո՞նց թէ: Էս գողի, աւագակի տարին ես կնիկմա՞րդ կթողնեմ, որ մենակ դուրս գա տանից: Խալխն իմանա ի՞նչ կասի:

ՈՒՍՏԻԱՆ.– (Ներս է մտնում):

ՆԱԶԱՐ.– (հետեւում է նրան) Եղպէս: Վախիլ մի: Ես Էստեղ եմ:

ՈՒՍՏԻԱՆ.– (Կրկին ուզում է դուրս ելնել եւ մօտենում է ձախ մուտքին):

ՆԱԶԱՐ.– (Հետեւում է նրան: Բայց Ուստիանը միտքը փոխելով ետ է դառնում եւ ինչ-որ բան մտածելով ուզում է փակել դարբասի դուռը:) Ուստիա՛ն, բան եմ ասում: Քանի չես քնել մի դուռը բաց պահի, լուս արա, գնամ ախոռը տեսնեմ իշի առջեւ գարի կա՞յ:

ՈՒՍՏԻԱՆ.– (Դժկամ կատարում է խնդիրքը):

ՆԱԶԱՐ.– (Դուրս է ելնում: Դրսից լսում է նրա խօսքերը) Դուռը չփակես, Եղտեղ կաց: (Քիչ աւելի հեռուից) Էս Էշի առջեւ գարի չկա՞յ, ի՞նչ է, (Միջոց) Վախիլ մի, ես Էստեղ եմ: (Լռութիւն: Լուսինը դուրս է գալիս) Լուսնակը դուրս եկաւ: (Միջոց) Կնիկ, ի՞նչ քարուան կտրելու գիշեր է: Դե՛նը բեր զենքերս, գնամ Դաղստանու խանի քարուանը կտրեմ բերեմ:

ՈՒՍՏԻԱՆ.– (Արհամարհանքով) Դէ, քի՛թդ սրբի, ծակո՛ւմդ մտի, քեզնից քարուան կտրող դուրս չի գայ:

ՆԱԶԱՐ.– Ա՛յ կնիկ, համբերութիւնից մի՛ հանի, քեզ ասում եմ, զենքերս բեր գնամ քարուանը կտրեմ:

ՈՒՍՏԻԱՆ.– Սա որ Էսպէս խօսքի տակ չի մնում, Էն հերսիցս ուտում եմ ինձ... (Վճռական) Քարուա՞ն ես ուղում կտրել:

ՆԱԶԱՐ.– Բա Ի՞նչ: Շան կնիկ, ինչի՞ չես թողնում գնամ քարուան կտրեմ:

ՈՒՍՏԻԱՆ.– Էլ հերիք եղաւ, քո մարդ ասողի հերն անիծած: (ներս մտնելով եւ դուռը փակելով) Դէ գնա քարուան կտրի:

ՆԱԶԱՐ.– Վա՛հ, վա՛հ, վա՛հ, դո՛ւռը, դո՛ւռը, ի՞նչ ես անում:

ՈՒՍՏԻԱՆ.– Ռա՛դ եղի: Քեզ հետ ապրելու սիրտ չունեմ:

ՆԱԶԱՐ.– Դուռը բաց արա, թէ չէ կջարդեմ:

ՈՒՍՏԻԱՆ.– (Լռում է:)

ՆԱԶԱՐ.– Բաց արա դուռը, չեմ ծեծի:

ՈՒՍՏԻԱՆ.– Դո՛ւ ես ծեծողը: Կրեմ գլուխդ: (Լռութիւն:)